

I'uleo O Le MALUA PAPA



Tala mai le Kolisi Faa-Faifeau i Malua / News from Malua Theological College; Lomiga XLIV - May 2021

TALOFA LAVA!

O le a taoto ia faa-maene o tai loloto paia ole Ekalesia Faapotopotoga Kerisiano i Samoa ma atunuu i fafo. Ae ou te muai faatulou i le afio ole Taitaifono ma le Laulau o le Fonotele, le nofo-a-komiti ma le mamalu o usufono tofia ole Fonotele o lenei Tausaga 2021. Soifua manuia ma le lagi matafi.

Ia ile Atua pea le viiga, ina ua taitai manuia mai le folauga a le Ekalesia, ua aulia manuia mai lana Fonotele i lenei Tausaga. Ui lava ini toatuga, ona o peau lagavale, a ua faamalo le tautai. Lea ua toa ane i lona Laumua le Sa o le Ekalesia i le masina atofa mo lana Fonotele, sei saili se tofa ma fili matagaga le faautaga, ma faatali le faasinoga a le Agaga Paia, ona toe tuu ai lea i tai le Sa ole Ekalesia ina sei faaauau le folauga ile talaiina ole Talalelei. Malo le taupati, malo foi le tauatai.

Ae faatalofa atu i le paia ma le mamalu ole au faitau o lenei Lomiga ole Maluapapa ile suafa o Iesu Keriso le Ao o le Ekalesia. Ole Lomiga o otooto atu ai tala o mea sa tutupu, o loo tutupu ma mea o le a tutupu i le Kolisi Faa-faifeau, i lona laufanua ma lona lotoifale, talu le Lomiga ua tuana'i atu.

Ia manuia lau faitau ma lau silasila. Ae tau lava ina sau isese tala le lagia ole Laumua nei, ona ole valaau a le



Susuga Ma'afala Limā FS
Pule o le Kolisi

Atua i se tasi ole au faigaluega totofi. O le uso sa matou tausoa le avega faa-faiaoga, ao se Faifeau Faauuina a le Ekalesia Faapotopotoga Kerisiano Samoa, a ua faamanava e le Matai Sili ana galuega. Ia tofaina oe Seumaninoa Puaina, le uso pele; ao se Fomai ole Tofamanino i le Tusi Paia. Alu ia oe i le fiafia o lou Alii. A ia pai ane le Agaga faamaise o le Atua i le Faletua ia Neda ma le Aiga.

Ua maea foi le faatofalaiga a le Komiti o le Au Toeaina, i se o le a tu i le foe, e faatautai le Sa o le Kolisi Faafaifeau ma le Aoga Tusi Paia. Tau lava ina ia Faamanuia le Atua i lau Susuga Vaitusi Nofoaiga, ole Faifeau

Fomai o le Tofamanino ile Matupusilisili; ma le Faletua ia Mile i oulua faiva. Ia sagai ane ai ole Tai, ia faatumu foi la oulua utu, ma ia utu pupuina e le Agaga ole Atua le Tofa. Ona muliai lea ose tala, ile loto faafetai ma le faagaetia, ona ole faatuatuga a le Komiti o le Au Toeaina, i so ma faatauvaa e taitaia le Kolisi Faafaifeau. Faafetai faafetai tele. Faafetai foi ile Komiti o Malua sa tua iai le vaivai ma le le tagolima. Malo le faasoa. E le galo foi Afia i si ona vao, ile Usoga a Faiaoga ma o latou Faletua. Ua taumasuasua le loto ma le agaga ile faafetai ona o la outou lagolago. Faafetai faafetai tele ile Kolisi i Aoao ma Faletua. Ia faamanuia le Atua ile gasologa ole taumafai. Faafetai ile Ekalesia ile tapuaiga ma le tatalo. Ua le ole lea!

Soifua.

Ma'afala Limā

Ma'afala Limā

PULE KOLISI MALUA

SILASILA I TOTONU

Talofa Lava! - Susuga Ma'afala Limā	1	Malua Journal	9
Amata Galuega a le Kolisi 2020	2	Aoaga a le Fanau	10-11
Saafiafiga mo Rev. Dr. Seumaninoa Puaina	3	Atina'e a le Kolisi	12-13
MBS Graduation Report	4	Motu le Pa a ua Iloa (cont'd)	14
Tautai A'e	5	Vaaga Eseeese i le Kolisi	15-16
Motu le Pa a ua Iloa	6-7		
Mafutaga a le Kolisi	8		

AMATA GALUEGA A LE KOLISI 2021

O le aso Lulu 27 o Ianuari i le itula e 12 i le aoauli, na toe a'e ai le Kolisi Faafaifeau i Malua mo le amataina o aoaoga o lenei tausaga 2021. Sa molimauina le autovaa mai o matua ma aiga ma faifeau o aulotu e momoli mai a latou a'oa'o fou ma fia auai ile sauniga e tatalaina aloaia ai feau ma galuega a le Kolisi.

E to'aluasefulufa (24) alii a'oa'o ma faletua e to'asefuluiva (19) o le vasega tausaga muamua ua ulufale mai mo le aotauina i le galuega faafaifeau i lenei tausaga.

E aofia ai ma le alii a'oa'o e to'atasi mai le Ekalesia Faapotopotoga Kelisiano Tokelau i lea vasega. E to'alua faiaoga fou ua faaopoopo mai ile galuega faafaiaoga ina ua mae'a lo la taumafai i le Kolisi Faafaifeau a le Pasefika i Fiti mo le 2 tausaga, 2019-2020; O le susuga ia Esera ma le faletua ia Pauline na faamanuina ile faailoga o le Master of Theology (Distinction) ma le susuga ia Leuelu Setu ma le faletua ia Panorama i le faailoga o le Master of Theology Church History.

O le itula e fitu (7pm) i le afiafi o lea aso, sa faia ai le sauniga lotu a le Kolisi e amata aloaia ai galuega o lenei tausaga. O le Ta'ita'ifono o le Komiti o Malua, Susuga i le Toeaina ia Asotasi Gu Time (FT) sa ta'ita'i i le sauniga. Na lagolagosua le susuga i le Toeaina ia Amuia Seuola (FT) i talosaga ma le susuga i le Toeaina ia Ailepata Leuta (FT) i le faitauina o le Tusi Paia. E toatele Tamā o le Ekalesia ma faletua, susuga i Toeaina Penisione ma o latou faletua, faapea le paia i le Aufaigaluega a le Atua, o aiga ma uo a le Kolisi sa auai mai i lea sauniga taua.

Sa faai'uina le afiafi i se taumafataga na tapenaina e le Kolisi mo le paia ile Ekalesia, matua, aiga uo ma e masani na afifio mai e molimauina le amataga o feau ma galuega a le Kolisi pei ona masani ai i tausaga taitasi. Na faai'u le po i le saunoaga faafetai mai ile Taitaifono o le Komiti o Malua ma faamanuiga mo le Kolisi aua le folauga o lenei tausaga 2021.

FAIAOGA FOU MO LE KOLISI



Susuga Esera & Pauline Esera

O le amataga o le tausaga na amatalia ai faiva ma tiute faafaiaoga a le Susuga ia Leuelu Setu ma le faletua ia Panorama Setu faapea le Susuga ia Esera Esera ma le faletua ia Pauline Esera i le Kolisi Faafaifeau i Malua.

O le fonotaga a le komiti o Malua na tofiaina ai susuga i faiaoga e galulue i le Kolisi Faafaifeau, ina ua talii mai ma le manuia, ua faaiuina o laua taumafai, ma o la faailoga o le Master of Theology mai le Kolisi Faafaifeau o le Pasefika i Fiti (PTC).



Susuga Leuelu & Panorama

O le Susuga ia Leuelu Setu i le Master of Theology i le matagaluega o le Tala Faasolopito (Church History), faapea le Susuga ia Esera Esera i le faailoga o le Master of Theology (Distinction) i le matagaluega o le Mataupu Silisili (Theology).

O loo galulue susuga i faiaoga i matagaluega e pei ona faauuina ai lo laua taumafai, e le gata o le Kolisi Faafaifeau ae faapea foi i le Aoga Tusi Paia a Malua (Malua Bible School).

Susuga Kara & Faletua ia Tuluiga Ipinui



Susuga Kara & Tuluiga Ipinui

O le susuga ia Kara Ipinui ma le faletua ia Tuluiga Ipinui, na amatalia foi i le tausaga lenei la laua auunaga faafaiaoga i le Kolisi Faafaifeau i Malua.

O le susuga i le faifeau faiaoga ma lona faletua na faaiuina mai lo laua taumafai mai Fiti i le tausaga 2017, ae na tofia e le Komiti o Malua e galulue i le Aoga Tusi Paia a Malua (MBS).

Ae peitai o le amataga o lenei tausaga na filifilia ai e faaaau le tautua i totonu o le Kolisi Faafaifeau.

SUEGA ULUFALE 2021

FEAGAIGA TUAI: NUMERA
FEAGAIGA FOU: GALUEGA

SA'AFIAFIGA MO REV. DR. SEUMANINO PUAINA

"O au nei o le toe tu ma le ola, o lē faatuatua mai ia te au, e ui lava ina oti, ae ola lava ia" (Ioane 11:25)

O upu faamafanafana ia na tomua iai le saunoaga a le Alii Pule ia Maafala Lima, na toa iai lagona faanoanoa ma le mafatia, o le Kolisi Faafaifeau i Malua, ina ua maua le tala faanoanoa, i le taeao o le Aso Gafua, 19 Aperila, 2021 i le itula e 10 i le taeao, ua faamanavaina e le Atua feau ma galuega a lana auauna, le Susuga i le Faifeau Faiaoga ia Dr. Seumaninoa Puaina, ao iai i sailiga togafiti o lona gasegase i Kalefonia, aiga faiaoga faapea le Kolisi i Malua i aoao loo alo le Kolisi i ana suega o le kuata le faletua ia Neda Puaina na liua ai le fiafia o pou o le saofaiga a Faiaoga, o se uso ma O le susuga i le Faifeau Faiaoga ia Dr. i le faasinoga a le Komiti o Malua, e ma faiaoga o le Kolisi Faafaifeau i Malua, i faatamasoalii, ua faaeeina lona faailoga o Tusi Paia e autu i le Feagaiga Fou mai le Kalefonia i Amerika. Mai lea faasinoga ma Dr. Seumaninoa Puaina, o se faiaoga o le valaau lona matai ua savali i le lima tausaga faiaoga i le Aoga Tusi Paia a Malua i le tausaga nei o lana tautua. Molimauiina e le Susuga i le Alii Pule ma le aiga Faiaoga lenei auauna i lona faamaoni ao feagai ai ma ona tiute. Sa faapea foi ona sasaa atoa lona tomai ma ona agavaa aua le aotauina o alo ma fanau a le Ekalesia e tapena ai mo le galuega a le Atua. O se auauna fiafia ma tausaaafia, i soo se itu o lana auaunaga. E fiafia foi i taaloga ma faamalositino. O ia o se tasi o sui o le autaaloo tapolo a le aufaigaluega Faiaoga.



Susuga Faifeau Faiaoga Foma'i
Seumaninoa & Neda Puaina

Amerika. O se aso e faagalo gata, i le Pule ma le ma faletua, ona e maua mai le tala faanoanoa, o muamua. O le oo mai o le tala, na faailoa mai e i le sao ma le loimata maligi, ona ua fa-ia, se tasi se tuagane i le galuega faa-faiaoga.

Seumaninoa Puaina, na valaauina e le Atua, e ala galulue ma lona faletua ia Neda Puaina e ave le tausaga e 2016, ina ua ae malo lana le fomai (PhD) i le tofamanino i Suesuega Faale-Graduate Theological University, Berkeley, lo la valaauina i le Kolisi sa galue ai le susuga ia Feagaiga Fou (New Testament Lecturer). E o auauna ai i lea tofiga. Sa faapea foi ona ia Matagaluega lava o le Feagaiga Fou i totonu o

O le susuga ia Seumaninoa Puaina, na ulufale mai i Malua ma lona faletua ia Neda Puaina i le tausaga e 2009, o se sui o le matagaluega a Amerika mo le fa tausaga. O le 2012 na faaiiina ai lo laua taumafai ma faauuina ai i le faailoga maua luga o le Bachelor of Divinity. Ona tuua lea e le susuga i le faiaoga le Kolisi i Malua mo le faaauuina o le taumafai i le faailoga o le PHD, i Berekley Amerika. Na faaeeina lona taumafai ma toe talii mai ai, e fai ma faiaoga o le Kolisi, mai le 2016 seia oo mai i le taimi na valaauina ai o ia e lona matai. E ulufale mai le susuga ia Seumaninoa i Malua o loo ia umia nisi faailoga maua luga mai Univesite eseese i totonu o Amerika. O ia faailoga e aofia ai le Bachelor of Science/Bio Chemistry mai UCLA ma le Master of Public Health mai CSUF.

O le masina o Mati, 2021 na tuua ai e le Susuga ia Seumaninoa Puaina ma lona faletua Samoa, ae faimalaga atu e saili togafiti i Amerika, ona ua gasegase le faiaoga. O le faamoemoe a manuia le sailiga togafiti, ona toe talii mai lea e faaauu lo laua valaauina. Aepeitai ua le o lea le faamoemoe sa talosia e le Pule ma le aiga faiaoga faapea le Kolisi. Sa lilo lava i manatu o le faigamalaga ua malaga iai le faifeau faiaoga, e le toe foi mai. O le oo mai ai o le tala faanoanoa, na moomoo ai maumau e pe ana iloa o le mea nei o le a tupu semanu e faamavae lelei atu i lana auauna. O le aso Tofi lava o le vaiaso lava lea, na faapapai atu ai le Alii Pule ma le aufaigaluega faiaoga i Malua ma Faletua ia Neda e ala i le sauniga lotu. Sei tuu atu le tauau e amo faatasi lagona o le mafatia ma le faanoanoa ona o le mafutaga ua pele ma mamae ma lana auauna ua tatata e le oti. O lenei sauniga na faatinoina i auala o upegatafailagi o le Zoom, na taitaina lava e le Alii Pule ma faia le upu faalaeia, ae fesoasoani ai Faletua ia Mile Nofoaiga, Torise Neemia, ma Lotu Latai i Talosaga. Na faamafanafana atu foi le Mafutaga a Tina ia Neda e ala i la latou lotu masani i Aso Lulu taitasi, na taitaiina e le Tina o le Kolisi, Lalokava Lima, e faailoa ai foi o latou lagona mafatia ona o le mafutaga ua motusia. Ao le avanoa foi na faaoo ai alofaaga molipo atoa ma faamafanafanaga o faletua o faiaoga, ma faletua o le mafutaga a tina Malua mo le faletua ia Neda. O le aso 23 o Me, ua fuafuaina ai se sauniga faapitoa mo le susuga i le Faifeau Fomai faiaoga, o le a faaagaina ai foi le Zoom e fesootai ai. O lenei sauniga o le a taitaiina ma faatino atu lava i Malua nei ma e auai faatasi mai ai le ekalesia i Vai o le Ola, o aiga ma uo uma i Amerika. O lenei faiga ona o le le mafai ona Malaga o le Kolisi ona o aiaiga faa-va o malo o le Koviti 19. O lona falelauasiga o le a faia i le Aso e sosoo ai, Aso 24 o Me, 2021. O lea sauniga e taitaiina i Susuga i Toeaiina o le matagaluega, faapea le Pulega Tutotonu. O Seumaninoa o se uso a faigaluega tausaaafia ona uiga. O lana ata e faauiga e nisi i le upu faaperetania (contagious), o ana saunoaga ma ona uiga, o le a misia tele e le Kolisi i Malua. Tautai ae lau susuga le faifeau faiaoga Dr. Seumaninoa Puaina. O lau tautua i le Atua e ala i le tofi faiaoga, ua tofo lelei ai le galuega a le Atua. Faafetai, faafetai tele mo lau tautua ia Malua, le iomata o le Ekalesia Faapotopotoga Kerisaino Samoa. O lou mitamitaga, sa e tiu ai, sa sii ma sapai. Sau ina ina alu i lena nuu lelei, o iai le olioli. Talofa ile lupe sa faalele a aiga ma le ekalesia, sa olo leomalie ile tovine i Maluapapa, a o lea ua le toe lagona atu lona leo. Leitio a tagi tui Tavita Aue, ua maliliu toa, ua maumau ai aupega o le taua. O upu a Paulo i le ekalesia I Roma faapea: *"Auā afai tatou te ola, tatou te ola mo le Alii, pe afai e oti, e oti mo le Alii; o lenei, pe ola pe oti i tatou, o tagata lava o le Alii i tatou."* Le uso, le tuagane, le faifeau faiaoga Dr. Seumaninoa Puaina, O oe lava o le tagata o le Alii. Faamanuina le suafa o le Alii. "Le auauna lelei e, ma le faamaoni ulufale maia i le fiafia o lou Alii"

Manuia lau Malaga!



AOGA TUSI PAIA MALUA 2021

E ofo alofa ma faafeiloai atu i le Suafa o lo tatou Alii o Iesu Keriso!

O le masina o Fepuari sa toe amatalia ai polokalame a le Aoga Tusi Paia i lenei tausaga. O polokalame e masani ai; a ua iai faiga fou e atiae atili ai lona faasoaina.

O le tausaga na te'a nei na sii aloaia ai se matalalaga fou e faatino ai aoaoga e aunoa ma le solia o tapu a le Malo i fesootaiga ma femalagaiga talu le faamai. O le metotia e patino mo aoga i luga o le upega tafa-i-lagi e mafai ai ona fefaasoa'i le faiaoga ma lana vasega e aunoa ma le potopoto ise nofoaga e tasi. O lona lelei, e laugatasia uma ai tamaitai ma alii o loo aoaoina i le Aoga Tusi Paia i Apia ma Salelologa. I le ma le isi, e le taofia ai le faagasologa o le aoga auā e lē solia ai tapu ma vavao ua faatulaga ona o atugaluga i le faamai. E faafetaia ai le Pulega o Tusi Pasi ma Faailoga Taualoa na faatupea lea faamoemoe, faatasi ma le CSL na faatautaia le aoaoina o lea faiga.

O lea ua tu le apitaga o Faiaoga i Salelologa i Savaii. O le taulaga a le Matagaluega o Faasaleleaga i le Ekalesia. Na tatala aloaia i le tausaga talu ai ma ua nofoia nei e Faiaoga pea malaga e faatino aoga i Salelologa. O loo ua faapitoa foi se vaega o lenei fale e fai ma Faletusi o le Aoga mo alii ma tamaitai o loo aooga ai o le Motu i Salafai. E faamauina pea le agaga faafetai i le Matagaluega a Faasaleleaga i lo latou so'oso'o tauau ile Aoga Tusi Paia; faapea foi le Pulega o Tusi Pasi ma Faailoga Taualoa mo le faatupega o tusi o le Faletusi.

O le isi matalalaga o lenei tausaga, ua sopo vasa i Sini Ausetalia le Aoga Tusi Paia. O lenei lala fou o le aoga, o le ata manino lava lea ole manaomia o aoaoga faa-le-Tusi Paia ma faa-le-mataupusilisili mo tagata nuu o Samoa o aumau i atunuu ese. O le Susuga i le Toeaina ia Taeipo Malifa, ma Susuga i Faafeagaiga Fomai ia Faalepo Tuisuga ma Peletisara Lima o le a faafoeina vasega i lalo lava o le taitaiga a le Alii Pule, Sui Pule ma le Sooupu o le Aoga Tusi Paia i Malua. Talosia ia lea faamoemoe ia faataunuuna i le manuia.

O le Aso 13 o Mati sa faataunuuna ai le Faauuga lona 10, talu ona faavaeina le Aoga Tusi Paia i le 2007. E 19 i latou sa faauu i le Tusi Pasi i Aoaoga Faale-Mataupu Silisili, ma le 38 sa faamanuiaina i le Tipiloma i Aoaoga Faale-Mataupu Silisili. O le faauuga foi lenei ua ausia ai e sui mai le lala i Salafai faailoga o le Tipiloma. E 11 tamaitai sa faauuina, ae 10 ulugalii. Sa faauuina ai foi nisi mai Ekalesia eseese e iai le Metotisi, Worship Centre, Aso Fitu ma le Mamona. O le Susuga i le Taitaifono o le Komiti o Malua, le Susuga i le Toeaina ia Asotasi Gu Time sa ia taitaiina le sauniga i lea aso. Mo ē uma sa faauuina i lenei tausaga, ua faamalō le taupati, malō le tauivi.

O se lipoti lea o le Aoga Tusi Paia a Malua. Talosia ia se tausaga filemu ma tumu i faamanuiaga. Manuia foi le fonotele a le Ekalesia. Ia ia te outou uma le manuia ma le filemu o le Atua!

O la outou auauna ia Keriso,

Latu Latai

Sooupu o le Aoga Tusi Paia a Malua



FAAUUGA FAIFEAU SAMOA (MELEPONE & TUPE ISARA)



Susuga Faifeau Faiaoga
Melepone & Tupe Isara

O le Aso Toonai 15 o Me, 2021 na faataunuina ai le sauniga lotu faapitoa i le malumalu "O Le Fale Iupeli", e faauuina ai faifeau ma faletua e toa sefulu ma le iva. O le to'aiva o i latou nei na faauuina lava i Samoa, a'o le isi toa sefulu o loo alala i atunuu mamao. O i latou ua agavaa mo le tautuaina o le Upu ma le Sakarameta a le Atua ma ua taliaina e avea ma Faifeau Samoa (FS) ole EFKS. O lenei sauniga, sa faauuina ai foi se tasi o faiaoga Malua, le Susuga ia Melepone Isara ma le faletua ia Tupe, e avea ma Faifeau Samoa.

O le Susuga ia Melepone ma le faletua ia Tupe, sa faaiuina lo la taumafai mai le kolisi i Malua ile tausaga e 2016, ma faaaauatu ai i le Pacific Theological College i Fiti, i le tausaga 2017-2018 ile faailoga ole Master of Theology. Na talii mai i laua mai Fiti ma avea ai ma faiaoga Malua i le tausaga e 2019 seia oo mai i lenei tausaga, ma ua agavaa ai i laua mo le faauuga o Faifeau ole Ekalesia. Sa vaaia le sagisagi fiafia mai o aiga ma aulotu, e tapuaia ma lagolagosua i lea faamoemoe taua a le Ekalesia. Aua o se faamoemoe oloo tulimata'i uma e aoao ma faletua ua i'u mai le laumua ina ia ausia.

O le Susuga ia Melepone oloo galue nei i totonu o le Kolisi i le matagaluega ole Feagaiga Tuai. O le faletua ia Tupe, o loo galue i le Pulega o Tusi Pasi ma Faailoga Tauloa (SQA), faapea foi totonu ole Aoga Aso Sa a Malua, i le avea ai ma Faiaoga Aso Sa. E toafa nai o la alo. O moomooga ma alofaaga a le Susuga ile Alii Pule ma le kolisi, ina ia manuia le tulai mai o le Susuga ile Faifeau Faiaoga ma le faletua ma le aiga, i lea laasaga taua ole soifua tautua i le Atua, e ala i le ola valaauina i totonu ole kolisi faapea le Ekalesia.

TAUTAI A'E (KOMITI O MALUA)

O le leo ole agaga fiafia ma le fa'agae'etia na faatumulia ai le laumua i Malua ile Aso Faraile, 14 Me 2021, i se sauniga faapitoa na faia e aloaia ai le Penisione Malolo o nisi o Tama ma Tina ole Ekalesia mai le galuega faafaifeau. Le galuega sa gapatia ma fitaituga ai mo tausaga e tele, lea ua a'e manuia o latou faiva. E to'a sefulumaletasi (11) le aufaigaluega Faifeau, Toeaina ma Faletua na aloaia le Penisione malolo ai i lea aso, O toa manumanu ole Talalelei sa faalele e Aiga, Nu'u ma Ekalesia aua le Atua ma lona finagalo.

O lenei sauniga sa taitaiina e le Susuga i le Taitaifono o le Fonotele, le Susuga ia Tunumoso S. Iosia (FT). Ona o tulaga ua iai nei le faigata o femalagaiga, ua lē auai mai ai nisi o Faifeau ma Faletua o loo galulue i atunuu mamao, a'o i latou nei oloo alala i Samoa nei; *Faauga Matautia (FT) ma Maima Matautia ole matagaluega a Faleata, Limuaa Samuelu (FT) ma Daru Samuelu ole matagaluega a Apia i Sasae, Timoteo Moemausu (FT) ma Saitutuila o le matagaluega a Lotofaga-Lepa-Aleipata, Paulo Korua (FS) ma Uputuu Korua o le matagaluega a Apia, Mafi Faamoetauloo Taviuni (FS) ma Lepeti Faamoetauloo o le matagaluega a Faasaleleaga, ma Ruperake Petaia (FS) ma Mary Petaia o le matagaluega a Aana*. Ua faamalo le toa, ua outou tau le taua lelei, ua iu ia te outou le tausinioga. E faapito augafa se faamatalaga i le Susuga i le toeaina ia Faauga Matautia (FT), o se sui ole Komiti o Malua, o lē sa galue faatasi ma le Kolisi i ana galuega faatino. Malo le tau, malo le tauatai.

Ua outou togi le seu na lagatila, ua faapulou le tualima, malo fai o le faiva! Lea ua faaeaina outou e le Atua. Mapu ane loa ma le fiafia ma ia manuia tele le feagai ai ma faiga malologa.



MOTU LE PAAUA ILOA

SUI USUFONO A LE KOLISI MO LE FONOTELE 2021

O le Susuga i le Faifeau Faiaoga ia Olive Samuelu, o le usufono filifilia lea a le Kolisi mo le fonotele i lenei tausaga 2021. Ona o fesuiaiga i polokalame o le Fonotele agai ile faigapalota a le atunuu, ua le faataunuina ai le Pepa Autu mo aoaoga na tapenaina e le susuga ile Faifeau Faiaoga.

**AOAO MAI ISI EKALESIA O LE PASEFIKA**

Ao gasolo ai feau ma galuega faaleaoaoga a le kolisi i lea tausaga ma lea tausaga, e lē o tuua ai lava le auai mai o sui mai isi ekalesia ole Pasefika, e aotauina i totonu ole laumua i Malua. I lenei tausaga, oloo iai faifeau e toalua mai le Kiribati Uniting Church, o Beretia Unnang ma Teratabu Takaria, oloo ile vasega faaiuso ile polokalame ole BD with Honours. E toatasi le sui mai le Ekalesia Kelisiano Tuvalu, o le aoao ia Pio Galo ma le faletua ia Tacamo (tausaga 3). E toafa sui mai le Ekalesia Faapotopotoga Kelisiano Tokelau, o le aoao ia Iafeta Vaopuka i le vasega faaiuso, Lafoga Moelau (tausaga 3), Peoni Lapania ma le faletua ia Sela (tausaga 2), faapea ma le aoao ia Elisara Isaako (tausaga 1).

ASO MALOLO O LE KOLISI MO LE PALOTA A LE ATUNUU

O le aso 9 Aperila 2021 e pei ona atofaina e le malo mo lana faigapalota, sa faapena foi ona malolo ai le kolisi mo lea faamoemoe taua. O faiaoga, aoao, ma faletua e palota mo Savaii, sa tuu i ai le avanoa e malaga ai i Savaii ile aso Tofi, 8 Aperila, ina ua mae'a le faigalotu mo aoga lauga i le taeao. O i latou na palota i Upolu, na faamatu'u lava ile taeao ole Aso Faraile ina ua mae'a le lotu ole taeao, na amata ile 6:30am. A o i latou e le'i resitalaina mo le faigapalota, sa faamuli atu i le kolisi i lea aso.

OKENI FOU MO LE KOLISI

"Ia outou vivii atu i le Alii...Ia outou vivii atu ia te Ia ile leo o le pu; vivii atu ia te Ia ile leo ole napeli ma le kitara. Ia outou vivii atu ia te Ia ile topa ma le siva; vivii atu ia te Ia ile menime ma le faili. Ia outou vivii atu ia te Ia i sumepalo taalili; vivii atu ia te Ia i sumepalo leotetele" (Salamo 150.1a; 3-5).



O le pese vivii lea a le Faisalamo ua taualuga iai ana tusiga i le tusi o Salamo. Ua valaaauina ai mea uma e manava o le foafoaga paia e vivii atu ile Atua soifua. Ua faamanatu mai e le susuga ile Faifeau Pule ile aufaipese a le Kolisi lea valaau taua ile sauniga puupuu na faia ile falesia Iupeli II, e tatala aloaia ai le Piano Okeni (Organ) fou mo le Kolisi ile aso 28 Aperila 2021.

O le susuga ile Faifeau Sui Pule, Susuga ile Faifeau Faiaoga Foma'i ia Vaitusi Nofoaiga na ia ootiina le lipine, ona faaola lea ma ki leo esese o le laau e le susuga ile faiaoga taitai asafu le susuga ia Melepone Isara a o faalogologo le kolisi. O se laau ua mafa totoga i leo malie ma laau faili esese pei ona momoo iai le Faisalamo e tataua ona faaogaina e vivii atu ai ile Alii ma le leotetele. Ua faatupeina lenei laau mai taulaga sene a le aufaipese e lafaina aso Toona'i ma le fesoasoani mai a le Kolisi.

NETBALL FAIAOGA & FALETUA

O le masina o Mati 2021, sa faaulu ai le au netipolo a le kolisi o Malua ile taamilosaga netipolo a le asosi netipolo a Samoa, ua taua ole "Fast 5 Tournament: March Mayhem". O lea taamilosaga sa auai faatasi ai ma au a kamupani faapea ma kalapu netipolo esese i le atunuu. O lenei taaloga netipolo ole 'Fast Five', e toailima le au taaalo; e toatolu tamaitai ma alii e toalua, ma e ese mai i le taaloga netipolo masani ona e vave lona faatinoina. O lenei au sa faia lava e nisi o faiaoga ma o latou faletua, faapea foi ma nisi o alo ma fanau ole kolisi, ua iai le tomai mo lenei faagatama. O le faamoemoe laualuga lava, ina ia faatumauiina pea le soifua maloloina, ma maua foi le mafuta fiafia.



Fa'auau Itulau 14

ITULAU A FAIAOGA

Samoa Qualifications Authority (SQA) Post School Education & Training (PSET) ANNUAL CONFERENCE 2021

Taumeasina Island Resort, SAMOA
25th & 26th March 2021

O le Aso Tofi 25 Mati 2021 sa amataina ai se fonotaga faaletausaga a le Pulega o Faailoga ma Tusi Pasi Tauoloa poo le SQA Samoa Qualifications Authority, mo faalapopotoga ua resitalaina mo Aoga Faaauau PSET (Post School Education & Training). O lenei fonotaga sa auai ai pisinisi o loo faafaigaluega nisi ua maua a latou tusi pasi/tipiloma/tikeri mai le PSET. O le manulauti o le fonotaga mo lenei tausaga: *Improve Employability through Sustainable Partnerships between Post School Education & Training and the Workplace*. O le naunautaiga o le fonotaga ina ia faateleina ai avanoa faigaluega mo latou ua faaiuina o a latou taumafai mai Aoga Faaauau PSET, i le fefaasoa ai o pisinisi ma faalapopotoga o lo'o latou faaogaina le nisi o le au faauu i tausaga taitasi. O faiaoga mai le Kolisi sa avea ma sui o le laumua i lea fonotaga o le Sui Pule ia Vaitusi Nofoaiga (FS), faapea ma Makesi Neemia (FS), ma Alesana Pala'amo (FS).



L-R: Vaitusi Nofoaiga (FS), Makesi Neemia (FS), Alesana Pala'amo (FS), Soialo Sydney Faasau, Douglas Tomane.

E tele aoaoga taua sa luitau ai latou sa auai i le fonotaga, e pei o nei: (i) o le toe iloilo o ni galuega faatino (10 Agreed Actions) sa faataatia mai mo le SQA, i lana fonotaga faaletausaga talu ai i le 2019; (ii) o le soalaupule o ni galuega faatino (10 Agreed Actions) mai le fonotaga mo lenei tausaga seia aulia le tausaga fou; (iii) o le sainia o se maliliea (MOU Memorandum of Understanding) o se faigapaaga fou a le SQA ma se tasi o Aoga Faaauau i le Pasefika faapea ma Samoa le APTC Australian Pacific Training Coalition.

O se matati'a e pei ona faamauina e le SQA, o le Bachelor of Divinity with Honours (Level VIII) e pei ona tauaoina e le Kolisi, o se tikeri muamua lea ua aloaia mai e le SQA. O le Bachelor of Education Primary (Level VII) a le Iunivesite Aoao o Samoa (NUS) e lua ai tikeri ua aloaia mai e le SQA i le taimi nei i Samoa. O le tusi pasi a le Aoga Tusi Paia a le Ekalesia (Malua Bible School) o lea ua aloaia ai lana tusi pasi Certificate IV in Theological Studies e le SQA. Faapena foi ona aloaia ai le tusi pasi Certificate III of Fine Art a le Aoga Tusiata a le Ekalesia (CCCS School of Fine Arts and Museum) e le SQA. O se folasaga sa saunia e le Afioga ia Tuiaopo Andrew Ah Liki (Bluebird Lumber & Group of Companies) sa faatoa iloa ai le faaogaina o le au faauu mai PSET iinei i Samoa, i le gaosia ai o apa fau fale, faapea ma uaea pa moa ma pa povi o loo faia lava iinei i Samoa. E lua aso o le fonotaga, ma sa faaiuina lava i le sainia o le maliliea a le SQA ma le APTC. Sa lulu lima ma faatofa i se taumafataga mamā e faamanatuina ai lea faigapaaga taua mo Samoa ma ana Aoga Faaauau. Manatu o le ā faaauau pea le auai atu o sui mai le Kolisi mo fonotaga faaletausaga a le SQA i tausaga taitasi, e pei ona matou auai atu i ai mo lenei tausaga. Ia faamanuia le Atua i le Fono Tele a le Ekalesia, i le Usugafono a Samoa nei, faapea le Usugafono mai atunuu mamao o loo faaoga ai le Zoom mo lenei tausaga.

TALANOA VIRTUAL WORKSHOP

Talanoa Oceania 2021

On Legacies of Slavery and Colonisation in Aotearoa and Oceania

History 1: 20 March 2021, 8.00pm (Zoom: <https://zoom.us/j/99490101318>)

Moderator: Dr Nāsilī Vaka'uta Introduction: Dr Peter Cruchley

Speakers

Teoelusuvalu Dr Damon Salea
Pro-Vice-Chancellor, Pacifica University of Auckland

Naomi Wolfe
Lecturer, Australian Catholic University

Rev Dr Lulu Lalai
Lecturer, Church History, Malua Theological College

Talanoa Oceania 2021: On Legacies of Slavery and Colonisation in Aotearoa and Oceania.

O lenei fonotaga sa amatalia i le Aso 20 Mati 2021 i le faatautaiga a le Aoga Faafaifeau o le *Trinity Theological College* i Aukilani faatasi ai ma le lagolago a le *Council for World Mission* poo le CWM. O le faamoemoe o lenei fonotaga, o le faatalanoaina lea o aafiaga o faiga faapologa ma pulega faakolone i totonu o le Pasefika. E aofia ai i lea talanoaga le fesootaiga o le Faatuatuaga Kerisiano ma ia faiga sa taotaomia ai o tatou tagata. Sa faatauaina i manatu le toe lauliliuina o le talafaasolopito o le Lotu Kerisiano i le Pasefika ma ona aafiaga, ina ia maua ni tali mo nisi o faafitauli o loo feagai ma tagata Pasefika i lenei talatalufou nei fonotaga o loo faaauuina pea i luga o le upega tafaiilagi.

MAFUTAGA A LE KOLISI

RIPOTI MAFUTAGA A'OA'O MA FALETUA

E muamua pea ona sii le viiga o le faafetai ma le faaneetaga i lo tatou Tapaau i le lagi, ona o lana taitaiga mana i lo outou soifua ma so matou nei ola. O ai na manatu o le a o tatou taunuu mai i le faaiuga o lenei Kuata i le manuia, aua e moni lava i ni fa'atatau ma ni fuafuaga ae o se foe lava e faae'e i le tau pe ana le auai le Atua i la tatou folauga, o lea ua fulifao ai le vaa o mala ae lalaga le vaa o manu. A o sina ripoti lenei a le mafutaga mo le afa o lenei tausaga. E maeu lava le alofa o le Atua i le mafutaga a aoao ma faletua ona e mai lava i le amataga o le tausaga seia oo mai i lenei masina, o loo manuia le lautele o le mafutaga, se'i vagana nai aoao ia Periti Tauapa'i (Tausaga 2), Falefiaoalii Ulugia (Tausaga 2), ma le aoa'o lagolago ia Lafoga Moelau o le sui o le (EFKT) ua malaga atu i Ausetalia, o loo faataotolia i gasegase o le tino. Ma o loo tuuina pea i talosaga i le Atua le feagai ai o i latou ma ma'i o le tino. Sa gasolo lava polokalame uma a le mafutaga e pei ona masani mai ai i tausaga ua mavae. Sa molimauina le galulue malosi o aoao, aemaise i uso faatoa ulufale mai. O se luitau tele mo le toatele o Tausaga Muamua ona o le tau faamasani i galuega. Ae ui i lea na iu manuia lenei vaiaso amata i le alofa o le Atua. E momoli atu le faafetai ma le faamalo i le vasega o faaiuso ma o outou faletua, susuga i lagolago ma le nofo-a-suega a lo tatou nu'u. E le mafai fo'i ona faagalo Tae o i Atua i le mafutaga a faletua ma lo outou lava papale ma onosa'i, i la outou pito laau tauave, ua tau ai lau o le faamoemoe i lenei vaiaso. Manatu lava ua outou le faia ona o so matou faatauvaa, ae ua outou faia ona o le Atua ma lona finagalo. Lau Susuga i le Alii Pule ma le Faletua, le Sui Pule ma Faiaoga ma outou Faletua. E momoli atu la matou faafetai tele i lo outou alofa faaalia e auala mai i la outou ta'ita'iga, a'o se alafua e limataitaina ai so matou faatauvaa ma so matou le atoatoa. Faafetai tele i lo outou titifaitama ma le faapalepale mai, e onosaia ai so matou vaivai. O le a sa matou auaunaga ua le tautamalii i le tauamamata ai o lenei tausaga, faamolemole ia natia lava i so outou alofa. E le agatonuina a outou Susuga i sa matou faamatalaga, ae o le tatalo a le mafutaga, ia alofagia e le Atua la tatou folauga mo le afa o lenei tausaga. Ia ta'ita'iina pea e aao agalelei o lo tatou Atua.

Penehuro Lilomaiaava (Peresetene)
Navie Luatua (Failatusi)

TAALOGA A'OA'O

O le ripoti lenei o taaloga a le Kolisi Faafaifeau i Malua mo le kuata muamua o lenei tausaga faaleaoaoga, e faia i aso Tofi o vaiaso uma. O taaloga o le pa'i ma le soka faapea ai ma le kirikiti Samoa. E tusa ai ma faamaumaua a lenei komiti, na amata taaloga a le Kolisi Faafaifeau i lenei tausaga ile vaiaso muamua o a'oa'oga, o le vaiaso o le faamasani (orientation week), e faailoa ai ile tausaga muamua potu e fai mataupu, faatasi ai ma le faailoaina o faiaoga e aoaoina mataupu taitasi. O le aso Tofi la o le vaiaso lena le aso 4 Fepuari 2021, sa amata ai taaloga i lumā fale. Ua vaevaeina le Kolisi i au e lua, o le lanu uliuli (black) ma le lanu pa'epa'e (white). O vaiaso e lua na sososoo ane ai na faia ai kirikiti faa-Samoa ile va o pitonuu e lua, Tofuola ma le Fale Iupeli poo le Fale Lomitusi e pei ona sa masani ai. O loo iai le ipu mo lea tauvaga, ma o le tausaga muamua lenei talu ona faia lea taamilosaga ua manumalo ai le pitonuu a le Fale Iupeli i taaloga ia e lua. Ae ua vaevaeina foi au a aoao mo taaloga kirikiti i au e fa; (1) Lanu Meamata, (2) Lanu Moana, (3) Lanu Samasama, (4) Lanu Mumu. E lei amataina la le taamilosaga lenei o loo iai le faamoemoe o le susuga ile faiaoga o loo taitaiina taaloga faapea la latou komiti faafae, e amataina lea taamilosaga pea amatalia le kuata lona lua. O le tele la o vaiaso na faia lava taaloga i lumā fale, o le lakapi pa'i ma le soka (soccer) ua faamauiina ai e fitu manumalo a le au lanu uliuli ae tasi le manumalo a le au lanu pa'epa'e, ma le aso sa faia ai siaki faafomai mo fatuga'o sa faatinoina ai taaloga ise tulaga fa'afa'aafu ona sa to'atele a'oa'o na tuai ona uma a latou siaki i lea aso.


Ma le faaaloalo lava
Komiti o ta'aloga

TAALOGA A FALETUA

E maua luga pea le viiga o le Atua ona ua taitai manuia mai lo outou soifua ma lo matou ola i lenei vaega o le tausaga. E avea lenei avanoa e faatalofa atu ai i le paia o le Ekalesia, laulau o le fonotele ma le loaloa o le Ekalesia i ona tulaga faalupe, ua aofaga potopoto mai, i le amatalia ai o le fono-usu a le Ekalesia i lenei tausaga. O le ripoti lenei o tala o taaloga a le Mafutaga Tina a Malua o lenei tausaga. O faletua o faiaoga o loo i le Komiti o Taaloga 2021, e aofia ai Sina Wulf, o le taitai komiti, faatasi ai ma Maria Samuelu, Tuluiga Siasoi, Panorama Leuelu ma Pauline Esera. O isi faletua o le komiti, e aofia ai faletua uma o le Tausaga Fa, e iai Logosau Tavita le taitai o taaloga, ma Naomi Alaimoana, o le teutupe o taaloga. O le faagasologa o faatinoga o taaloga mo lenei tausaga e nafa ma lenei komiti, ae o loo faamalumu ai le fautua a le Susuga i le faletua o le Alii Pule, Lalokava Limā. O le manulauti tauave o taaloga a faletua i lenei tausaga, o le **“Taulamua i faatinoga e maua ai le soifua maloloina” (Leading a healthy lifestyle)**. O le faamoemoe, ia aoga taaloga ma isi faatinoga ua fuafuaina e le komiti o taaloga e maua ai le soifua maloloina lelei o tina o le mafutaga, e faaitiitia ai le tino puta, toto-maua luga, ma'i suka ma isi faama'i e afaina ai. O le naunautiga lava, ina ia maua pea le soifua maloloina e faaauau ai le soifua aotauina aemaise o le galuega tala'i a le Atua o loo faatalitali mai. O nisi nei o faatinoga sa mafai ona faatinoina i lenei kuata ua mae'a faa-komiti taaloga, e aofia ai: (1) **Fuaga pauga – weight loss** - fua le mamafa o le faletua i le amataga o kuata taitasi, ina ia tulimata'i ai pea le tulaga o le soifua maloloina o loo iai, e manino ai foi poo ai o loo moomia tele se galuega e toe fia fai iai. (2). **Taaloga** - E lua taaloga sa faatinoina i lenei kuata, o le volipolo ma le netipolo. E tulagaese le talenia o faletua i taaloga uma nei e lua sa maitauina. (3). **Siaki faa-falemai, 4 Mati** - Sa faatinoina lenei siaki e le Faalapopototoga o Fatugao a Samoa – National Kidney Foundation, mo le mafutaga a faletua ae na aofia ai foi ma aoao ma faiaoga. O isi taaloga o loo fuafuaina mo le isi kuata o totee, e aofia ai le touch rugby ma le netipolo. E fa (4) au o loo vaevaeina iai faletua, ma o lo o faaigoaina nei au i pitonuu i totonu o Malua. O Tofuola (blue), Maluatai (red), Atina'e (green) ma Tineiafi (orange). O se ripoti lea mai taaloga a faletua Malua i lenei afa tausaga, manuia tele le alo atu o le Ekalesia aoao i lana fonotaga i lenei tausaga. Faafetai.

Logosau Tavita

MALUA JOURNAL 2021



O le tasi lava o vaaiga taulai a le Kolisi o le tusia lea o manatu ma aoaoga faa-mataupu silisili e le gata i la tatou lava gagana ae ia faafaigofie aua le faitau a le toatele o sui o le Ekalesia. E le gata ia fiafia ai e faitau ae ia malamalama ma aoaoina i le gasologa ma ni suiga o le vaai faa-mataupu silisili ua iai nei a le ekalesia. E faapea foi i metotia ma ituaiga o faitauga ma le faauigaina o le Tusi Paia mai le vaai a le tagata lotu EFKS e maua ai ni manatu e foia ai le tele o luitau o nei ona aso. O le faamoemoe lea o tusiga o loo i lenei tusi. O tusiga poo pepa na saunia e faiaoga o le Kolisi mo le Mafutaga Faafouina a Faifeau ma Aoao Tausinuu i le Tausaga 2019. O nei tusiga o loo aofia uma ai Matagaluega o loo aoaoina i le Kolisi e pei o le Mataupu Silisili, Faivaalofilima o le Mataupu Silisili, Feagaiga Tuai ma le Feagaiga Fou, faapea le Talafaasolopito o le Ekalesia Kerisiano. E sefulu ma le tolu tusiga o loo iai i lenei lomiga. O loo aofia ai ma le pepa a le susuga ia Dr Arthur Wulf sa folasia i le Fonotele 2019. O loo iai foi pepa e lua o loo tusia i le Gagana Peretania na tusia e Dr Samasoni Moleli Alama. O nisi nei o pepa o loo iai i lenei lomiga.

- O le Atua ma Malo Faalelailagi (Manu Uigaese) oi le Mataupu e Fitu o le Tusi a Tanielu (Dr Arthur Wulf)
- Enlarging Borders and Territory: Contrasting Texts from the Pentateuch, Amos, and Chronicles (Dr Samasoni Moleli Alama)
- Motugaafa mo Upu Faaii o ni faatasiga poo ni mafutaga – Upu mai le Feagaiga Fou ma le Aganuu (Mavaega) (Vaitusi Nofaiga)
- O Iesu ma le Tulafono o le Fa'amamaina Mataio 9:18-26 (Apela Ah Him)
- Malo o le Atua (Dr Taipisia Leilua)
- Tafatolu [three-sides]: O le Taiala mo Su'esu'ega agai ni Galuega Fesoasoani a le EFKS (Dr Alesana Palaamo)

FAAMULI O LE ESETA, TAUSAGA MUAMUA, 2021

Tulouna le tulaga tuvale o le auuuna faatauavaa. Magalo le leo vaivai ae sei ootoo se tala i le faamuli a le Tausaga muamua i aoao ma faletua i le vaiaso o le Eseta, 1-5 Aperila 2021. O le Susuga i le Alii Pule ma le Faletua na ta'ita'i le faamuli, faatasi ai ma le lagolago malosi mai o le Susuga i le faifeau faiaoga ia Filemoni ma le faletua ia Alofa ma le Susuga ile faiaoga ia Leuelu ma le faletua ia Panorama. O le Aso Tofi, 1/04/2021, i le itula e lua [2:00pm] na amata aloaia ai lenei faamuli. E 24 a'oa'o ma faletua e 19 o lenei vasega na auai uma ai.

Ole sauniga ile Aso Faraile o le Eseta, na ta'ita'ia e le Susuga i le alii Pule ia Maafala Lima, faatasi ai ma le Sauniga paia o le Faamanatuga. Na tofia nisi o aoao mo le tautuina o le lao'ai paia, o le faitauina o le Tusi Paia faapea foi ma tatalo o le sauniga. O le aoao ia Kaleuati Tusi na faitau Tusi Paia, Ceasar Utufua Naseri sa tatalo Faafetai, Vagatai Muaau na tatalo i Faatoesega, ma Peresia Muagututia i le tatalo o Manaoga.

Sa tapenaina foi e le faamuli to'onai mo le susuga i le alii Pule ma le faletua ma le aiga faiaoga ma o latou faletua. Na saunia foi suava'i mo nisi o matafale o le aulotu ma malo a le kolisi sa auai mai ile sauniga. O le Aso Toonai na faamamaina ai le aai, e aofia ai ma le veleina o le togafualaaui fai sua i gauta. O tiute masani o le vaiaso o le faamamaina ma le leoleoina o le laumua, o le vaaiga o manupapalagi ma meaituaolō faatasi ai ma faatoaga o le Kolisi. O le afiafi e faatino ai faigalotu e tuu faasolo iai a'oa'o e taitaina.

O le sauniga o le Aso Sa o le Toetu, na ta'ita'ia lava e le susuga ia Maafala Lima faatasi ma lona auavaa mai faletua o le tausaga muamua. O le faletua ia Rosana Mauala na faitauina le Tusi Paia, Faleulu Levasa Tusi na saunia le tatalo Faafetai, Nora McCarthy Utufua i tatalo o Faatoesega, ma Silive Vagatai i le tatalo o Manaoga. O i latou foi ia na galulue ile tautuina o le uaina ma le areto ile sauniga ole Faamanatuga.

Sa faia le to'onai mo lea aso Sa taua ile fale senetenari, ona faai'u lea i se saunoaga faafetai a le susuga i le alii Pule o le Kolisi e faafetaia ai le faamuli mo tapenaga mae'ae'a o lea aso. I le afiafi o le Aso Sa ina ua maea aiga o le afiafi sa faia ai nai faafiafiaga laiti e a'oa'o ma faletua o pitonuu taitasi o le Kolisi. Na amata e le pitonuu o Malua Tai, ae faaii ia Tofuola Tai, le faatinoina o pese ma tala faatino e faataata i le autu o le Vaiaso Paia, "O LE TAU O LE ALOFA". O le mālīe o pese ma tauloto a a'oa'o ma o latou faletua, na fai ma faamalosiā ile faamuli ma faamautuina atili ai le mafuta faatasi o le auuso ma faletua.

O le Aso Gafua na taua luga ai feau ma tiute faa-faamuli i le aso taalo mo faiaoga ma faletua, alo ma fanau a le Kolisi ae na auai foi ma le faamuli. Sa tapenaina le BBQ mo lea Aso Taalo fiafia, ona faaii lea o galuega a le faamuli a le Tausaga muamua i le



faigalotu na saunia e le susuga i le faifeau faiaoga ia Filemoni Crawley, ma faafetaia ai le Vasega i lo latou sao i le tausiga ma le vaaia lelei o le nuu, a'o feagai le Kolisi ma faiga malologa o le Eseta. Na faafetaia foi e le Ta'ita'ifono a le Tausaga muamua ma faalalolalo foi i ni faaletonu, aemaise o se faatinoga ua le atoa a'o feagai ai ma le faamuli.

E fia faaleo foi le agaga faafetai i aiga, matua, uo ma e masani, ae le gata i lea o faafeagaiga na tuu mai lo latou tauau, e lagolago ai lenei faamoemoe I soo se ala na ma'ama'au iai.

Faafetai faafetai lava.

AOAOGA A LE FANAU

AOGA ASO SA

Salamo 127: 3 “Faauta o le fanau o le tofi lea mai le Alii, o e ua fanau mai, o le tau lea mai ia te Ia”

O le viiga ma le faafetai i le Atua silisili ese, ona o le avanoa ua mafai ai ona galulue faatasi ma le Paia i le Aiga Faiaoga Aso Sa, aua le fanau i lenei afa muamua o le tausaga 2021. Sa amata le Aoga Aso Sa i le Aso Sa lona lua o le amataga o le Kolisi, Aso Sa 7 Fepuari 2021. Na amata lelei ma sologa manuia le Aoga Aso Sa, e le gata i aoga a Faiaoga i Aso Toonai aua tapenaga mo lesonea a le fanau, ae faapea foi Aso Sa taitasi, i le molimauina o foliga fiafia a nai fanau i le naunau e fia aoaoina. O tapenaga a faiaoga Aso Sa i vasega taitasi, mai le Vasega Amata seia oo i le Vasega Matutua Faapitoa, sa matagofie ma lelei.

O le aso 30 o Mati sa faia ai le polokalame faapitoa mo le Eseta. Sa faatinoina e faiaoga Aso Sa ma le Vasega Faaiuso le tala o le Aso Maliu, e toe faamanatu ma toe fafagu le Togiola na saunia e lo tatou Alii o Iesu Keriso, le uo a le fanau. O le autu o le faamoemoe i lea afiafi, “O le Tau o le Alofa”, e agai ai mafauaiga i le alofa o le Atua e ala ia Iesu keriso mo le lalolagi agasala aemaise i lenei vaitau o loo feagai ai le lalolagi ma le faama'i o le Koviti 19. O le aofai o le fanau o loo i le Aoga Aso Sa i le taimi nei mai le amataga o le tausaga seia oo i le taimi o le lolomiga o lenei ripoti, e 191.

Faamoemoe pea i le Atua o le a manuia galuega a le Aoga Aso Sa, i le agai atu i kuata o totoe.

Faafetai,

Isaako Junior Iose (Failautusi).

LITERACY

E muamua ona si'i le vi'iga ma le fa'afetai i le Atua ona ua fa'ai'uina ma le manuia lenei kuata i lona alofa ma lona agalelei. Ae o se ripoti lenei o le faitauga tusi fa'aperetania a le fanau. (literacy reading)

O lenei polokalame o lo'o i lalo o le ta'ita'iga a susuga i faletua o faiaoga (Lemau Pala'amo, Lotu Latai, Sina Wulf, Foketi Ah Him ma Panorama Setu), fa'atasi ai ma le lagolagosua a faletua o a'oa'o. O le auga o lenei faitauga tusi fa'aperetania ina ia fesoasoani lea i tamaiti i le faitauina o tusi i le gagana faaperetania. Ua vaaia lava le alualu i luma o le faitau a le fanau, e le gata i le faitau ae ua mafai ai e nisi o le fanau ona tautatala i le gagana faaperetania. O le 5 tausaga agai i le 9 tausaga, o fanau ia ua mafai ona auai i lea polokalame (po'o fanau ia ua i le year 1 agai i le year 4). O aso Gafua ma aso Tofi o vaiaso uma i le itula e 7:00pm i le 8:00pm, o le taimi lea o le faitauga tusi a le fanau. E fa'asolo uma iai faletua o a'oa'o e fesoasoani i fanau i le latou faitauga tusi fa'atasi ai ma susuga i faletua o faiaoga. E vaaia lava le sagisagi fiafia o le fanau pe a o'o i le taimi o le latou faitauga tusi ma e fiafia foi e ave tusi i le fale e faitau. E lagona ai lava le loto fa'afetai ona ua mafai ona matou maua lenei avanoa taua matou te fesoasoani ai i le fanau i lenei polokalame i totonu o le kolisi, aua o tiute uma ia o le ola valaauina mo le Alii ma lana galuega. Ia manuia tele tiute ma feau o feagai ai.

Faafetai

Lautele Ailepata Leuta



AOGA A LE FANAU

MALUAPAPA AOGA AMATA (KINDY)

O le viiga ma le faafetai i le Atua, ua maea le kuata muamua i galuega a le Maluapapa Aoga Amata i Malua i lenei tausaga 2021. O lenei galuega e i lalo o le faamalumaluga a le Alii Pule ma lona Faletua, faatasi ai ma le lagolago a le Faletua o le Sui Pule ia Mile Nofoaiga. Na amatalia le aoga i lenei tausaga i le Aso 8 Fepuari 2021. O taimi o le aoga, e amata i le 8.30am ae tuua i le 11am, mai le aso Gafua i le Aso Tofi, se'i vaganā le Aso Faraila e amata i le 8.00am ae tuua i le 10.30am. O le aofaiga o tamaiti aoga e 31, e toa sefulu fitu tama ae sefulu fa teine. O tamaiti auai o le Aoga Amata, o alo lava o Susuga i Faiaoga, a'oa'o ma faletua. E tofia e le faletua o le Pule faletua o a'oa'o e galulue i le Aoga Amata i kuata taitasi.

O a'oa'oga ma polokalame fai i lenei kuata sa mulimulita'i i le taiala o loo fa'aaogaina e Aoga Amata i Samoa nei. O ia polokalame e iai ona manatu autu e fai ma taiala mo kuata ta'itasi. E pei ona iai le autu e ala i le a'oa'oina o mataupu i soifuaga lautele i le kuata muamua 2021, o lona manatu autu o le "TAGATA". E amata lava mataupu i lenei autu, i le faailoaina o le Aiga, o tagata e tataua ona iai i totonu o se aiga e pei o le tamā ma le tinā; o le Lotu e pei ona iai le Falesa ma le Faifeau; o le soifuaga o le tagata e aofia ai le tausaiaina o le soifua maloloina, o taumafa paleni ma le ola i se siosiomaga mamā. E faapea foi ona a'oa'oina le fanau i mata'itusi (Alphabet) faa-Samoa ma le faa-Peretania; O fuainumera e pei o le faitauga mai le 1 e oo i le 20; o lanu eseese e pei ona iai i le nuanua (Rainbow colors); o siepi (shape) eseese e pei o tafatolu ma faa-tafafa. A e lē gata i lea, o auaunaga lautele e moomia ma faatinoina e tagata, e pei o le foma'i, teine tausima'i, o le fuimū ma le leoleo. E faia folasaga (presentations) a faletua o a'oa'o i vaiaso taitasi, mo polokalame faa-le-a'oa'oga mo aso taitasi a tamaiti, i lalo o le vaaiga a le faletua o le Sui Pule ia Mile Nofoaiga. O le faamoemoe autu ia iloa e tamaiti vaega faavae (basic facts) o ia mataupu eseese a'o le'i ulufale i aoga tulaga lua (primary school).

Na faatino foi le polokalame o le Eseta. Ole vaiaso atoa lea na faia ai galuega faatino (activities) e faatatau i le Eseta. Faataitaiga: valiina ma le teuteuina o Easter cards, faapipii Easter bunny faces, ma isi. Faatino ai foi e faiaoga se tala e uiga i le Eseta ma faia ai pesepesega a tamaiti i le 'Toetu o Iesu.' Na faauma le faamoemoe i le "Easter Egg Hunt" a tamaiti ma tufatufaina ai a latou Easter egg baskets.

Na asia e le 'Matagaluega o Aoga, Taaloga ma Aganuu (MESC)' le matou Aoga Amata i lenei kuata. Ua mae'a foi ona toe faaleleia nisi vaega moomia mo le faleaoga e pei ona iai le suiina o le kapeta ma nisi. O se tala fiafia lea mo galuega fai a le Maluapapa Aoga Amata i lenei kuata ma lona agai i luma.

O le Aso Tofi 29 o Aperila na tuua ai le Aoga Amata a Malua mo lenei kuata.

Ma le faaalalo lava,
Renolla Matatia

MALUA STUDY CENTRE

O le tausaga 2021 na toe amatalia ai le Malua Study Centre e ala i polokalame faamasanai ma faalauiloa (Orientation programme) mo alo ma fanau uma faapea ai ma faiaoga. O lea po sa faafeiloai ai fanau uma aemasie o e fou mai, o alo ma fanau a le Tausaga 1. Sa auai uma tamaiti faapea ma faiaoga o le a faatautaia le galuega i lenei tausaga. Sa saunoa faapitoa le Susuga i le Tama Pule, o le taitai foi o le MSC, mo faiaoga ia faamamafaina le taua o lenei auaunaga mo fanau ina ia tuu iai le faamaoni ma le fai mea lelei o faiaoga. Faapea foi i tamaiti ina ia faaoga tataua avanoa e saili fesoasoani ai i faiaoga ma susesue atili ai ia latou meaaoga. E ova atu i le 50 le aofai o tamaiti na omai i lenei faalauiloa ma le faamasani ma o le toatele lava o fanau a le tausaga muamua. O se fiafiaga tele lava mo le Alii Pule ma faiaoga o le vaaia lea o le agai i luma o le ola aoaoina o fanau aemaise fanau matutua ua ausia le Iunivesite. Ao le fiafiaga tele lava foi, o le vaaia o le suiga o fanau laiti ua mafai ona loto tetele e fesili mo se fesoasoani. O le vaega aupito i alualu i luma lea o le Study Centre ua molimauina. Ua le toe maua le matamuli o fanau e saili fesoasoani i faiaoga ia latou meaaoga. Aua o le talitonuga lava o loo unai i tamaiti, o le tamaititi e fesili e maua tali, o tamaiti e maua tali, e faateleina lona iloa.

O lea e lagona ai lava le faagaetia ona o le lagolago a Susuga i Faiaoga ma Faletua o le Kolisi, faapea Aoa ma Faletua uma o loo faaavanoaina taimi e fesoasoani ai i nai fanau.

E faapitoa lava le faafetai tele i lau Susuga i le Tama Pule, Maafala Lima ma le Faletua ia Lalokava. O le mea moni o la oulua faamaite ua tino mai ai lenei itutino taua mo a tatou fanau i Malua. O le a manatua pea oulua ona o lo oulua sao i le faatuina o le MSC aemaise o la oulua lagolago malos i tausaga uma ina ia unaia lenei faamoemoe taua mo alo ma fanau a Malua.

Ia faamanuia tele le Atua i le isi laasaga o lo oulua valaauina i lana feau ma le galuega. Matou taumafai pea e faaauau ma faatino lenei auaunaga taua aua se lumanai manuia o alo ma fanau a Malua.

ATINA'E A LE KOLISI

PA POVI

E tumau pea le viiga ma le faafetai i le Atua ona o lana pule faasoifua i lo outou soifua ma le ola. Ao le ripoti lenei o le vaega a le Pa Povi a le Kolisi i Malua i lenei tausaga. O le atinae lenei o manu papalagi i totonu ole Kolisi, o le isi lenei vaega taua ole soifua aoaoina o alo ma fanau ale Ekalesia e fai ma luitau e luina ai le tafatolu o le ola taumafai, o le tino, mafaufau ma le agaga. Ua masani foi le toatele ole afaigaluega faifeau i aga masani a le Kolisi, pe afai e faatino se galuega i le faamamaina o le pa povi, aua ole mea moni e le faigofie. Aua e vele ese uma le vao leaga, ae faaola le vao lelei.

I le taimi nei e 7 pa o lo o faaaogaina mo le atinae povi a le kolisi. Ma o loo talafeagai pea nei pa ma le aofai o manu oloo mafai ona tausai i le taimi nei, e tusa ai ma le fautuaga a le ofisa o lafu manu i Avele. E 20 le aofai o manu papalagi o lo o iai i lenei taimi. I le faatumauiina pea ole ola maloloina o manu ole pa, oloo fesoasoani mai le vaega o lafu manu i Avele, e ala i vailaau mo le tausaiaina o manu faapea ma le fesoasoani malosi ale kolisi ile teuina ma le faamamaina pea o pa ina ia maua pea le vao lelei mo manu papalagi.

I le taimi nei e toa 7 aoao oloo galulue ile vaega ale pa povi. I lenei avanoa taua e fai ma sui o lenei vaega, i lalo o le taitaiga a le susuga ile Faifeau Faiaoga ia Apela Ah Him, faapea le susuga ile Faifeau Faiaoga ia Kara Siaosi, e faailoa ai le agaga faafetai tele o le vaega ale pa povi ile susuga ile Alii Pule faapea le kolisi ona ole fesoasoani malosi ma le lagolagoina pea o taumafaiga o lenei atinae taua e tua iai le kolisi i taimi e moomia ai. Ia manuia le Fonotele ma ona taualumaga uma i lenei tausaga ile alofa ma le agalelei ole Atua.

I le ava ma le faaaloalo lava.

Peni Manila & Kapeni Matatia

MAUMAGA

O lo'o sologa lelei ma manuia tulaga uma i maumaga a le kolisi, o loo taoto foi i se tulaga lelei le amatalia ai o feau ma galuega o lenei tausaga, faapea foi i asiasiga sa faatinoaina. O lenei lava kuata, sa tasi ai le asiasiga sa faatinoaina, o le faatiapulaga e 1000 ma o lea lava ua i ai le faamoemoe, o to'aga na o le a tua i ai le faaiuga o lenei tausaga i mea fai o le Kolisi, ma auaiga taitasi. Ile mae'a ai la ole asiasiga, sa maitauina le atoa uma ai o tusaga a maumaga taitasi.

E ui ina sa feagai ma mugala i le tele o aso ma tau afaina ai le ola lelei o talo, peitai o lea ua toe vaaia le ola lauusiua ina ua tetele mai timuga i le faaiuga o lenei kuata. O lo'o malu puipua lelei le pa ma o le vaega lava a le Samoa Land lea o loo nafa ma le vaaiga o le pa ina ne'i sao mai ai i totonu puua ma satia ai maumaga. Sa iai nai afaina laiti o le pa, ae peitai, na vave ona toe faaleleia vaega uma sa faaleagaina, ile tele o laau sa pauu i luga o le pa.

O le vaega a le maumaga, oloo taitai lava e le susuga ile faifeau faiaoga ia Dr. Arthur Wulf, ma ua faapena ona lagolagosua mai i lenei tausaga le susuga ile faifeau faiaoga ia Kara Siaosi, ma le faiaoga ia Esera Esera. I le afa foi o le kuata muamua sa amata ai aoao tausaga muamua e toalua, aua le faamasani ai i le gasologa o galuega a lenei vaega.

E momoli le agaga faafetai i le susuga i le Alii Pule, faiaoga ma auaiga taitasi i le lagolagoina malosi o asiasiga sa taumafai iai le komiti i lenei kuata. E le gata o asiasiga tiapula, ao le faamamaina o maumaga taitasi i taimi o asiasiga.

O le tatalo a le komiti ma le veaga a le Samoa Land, ia manuia tele gasologa o feau ma galuega i lenei tausaga.

Faafetai, Komiti o Maumaga

ATINA'E A LE KOLISI

TOGALAAU AINA

O le viiga ma le faafetai i le Atua e le faaitiitia, ona o lana pule to ma lana pule faasoifua i lo outou soifua ma so matou ola vaivai. Aua ana le seanoa lona alofa tunoa ma lona agalelei, e le tau manuia feau ma galuega o lenei foi kuata faa-le aoaoga.

Ae avea ia lo'u faatauva'a e fai ma sui o lo matou taitai le Susuga i le Faifeau Faiaoga ia Dr. Samasoni Moleli ma lenei vaega, e faailoa atu ai se ripoti e tusa ai ma galuega faatino a lenei matagaluega i lenei foi kuata. O le auga lava o lenei faamoemoe ina ia faaauau pea le faatinoina o lenei auaunaga ina ia tua iai le nuu aua le fofoga taumafa aemaise lava o le tausia o le soifua maloloina.

E toa 14 a'oa'o o loo galulue ai i totonu o lenei matagaluega e aofia ai, Laveai Fonomaalii Sene, Faafetai Nepo, Ailepata Ailepata, Mika Suesue, Maotua Maiava, Collin Faletose, Faafetai Korina, Iosua Leatigaga, Matthew Tagaloa, Saleaula Reti, Michael Alai, Brian Anae, Nili Faauma ma le Susuga ia Aperamo Lautasi.

O loo maitauina pea le galulue malosi ma le faimea fiafia o Susuga i a'oa'o o loo auai i totonu o lenei vaega, aemaise ai lava o le lagolagosua o le nuu atoa i Susuga i a'oa'o pe a manaomia e lenei vaega se fesoasoani mo se galuega e fia faatinoina. O se auaunaga e moomia ai le loto tetele ma le onosai aemaise o le faamaoni e faatinoina ai, aua e faatino i aso uma, ae o se fiafiaga ile loto pe a oo ile taimi o le selesalega aua e galo uma lava le vaivai ma le lelava pe a vaai atu ua tino mai se faamoemoe sa fitaituga iai. O lea ua maea ona faasafua i le nuu atoa fua mua o a tatou kapisu ma ua faasopolia uma lava. O nisi o fualau aina e pei o pi, tamato, kukama, isaraelu ma saga, o loo faatino pea le galuega o le tausia lelei ina ia fua mai ona faasafua foi lea aua le soifua maloloina lelei o le tatou nuu, ae e le o tuua ai le totoina pea o le kapisu. Pau lea o se ripoti ua mafai ona tuufaatasia mo lenei kuata faa-le aoaoga, ae o loo sologa manuia pea mea uma ma le galulue fiafia o lenei matagaluega ile faatinoina o ia galuega uma.

Ma le faaaloalo lava

Ailepata Leuta

Laveai Sene

Faafetai Nepo




MOTU LE PA A UA ILOA (cont'd)

MALUA 'ITS' (INFORMATION TECHNOLOGY SERVICES)

E talitonu ua silafia uma faigata ole faamai ole Koviti 19 o loo ua aafia ai Samoa ma le lalolagi atoa i lenei vaitau. O se faamai ua aafia ai foi gasologa o feau ma tiute o le Ekalesia ma lana Fonotele i lenei tausaga, ona o le faafaigata ai o femalagaiga i va o atunuu, aua ua toatele sui usufono ua lē mafai ona auai mai i lenei tausaga (2021), faapea foi le tausaga ua mavae (2020).

Peitai, ua mafai nei ona faafaigofie fesootaiga ma sui Usufono oloo alala i atunuu mamao, ona o auala faatekonolosi faonapo nei. O se



fesootaiga e faia i luga o upega tafailagi, i se polokalame ua taua o le 'Zoom', ua mafai ai ona fevaaia'i ma fefaasoa'i sui Usufono e faaoga ai masini faatekonolosi.

O le faatautaiga o nei ala o fesootaiga e moomia ai le tomai faapitoa i tulaga tau 'computer' poo le Information Technology (IT). Ae faafetai oloo toatele lava aoao Malua oloo iai lea tomai, ua faafaigofie ai ona faatinoina ia faiga uma. O le vaega o le IT a le Kolisi, e i lalo o le taitaiga a le Susuga i le Faifeau Faiaoga ia Dr. Alesana Palaamo, e aofia ai ma aoao e to'a fitu, i latou sa galulue ma maua faailoga i lea galuega o le IT.

O la latou auaunaga mo le Ekalesia, sa amatalia i le Fonotele Faafuasei 2020, ma o lo o faaauau mai lava seia oo mai i le asō. Ua le gata ile Fonotele, ae sa faatinoina foi i Fono o Komiti eseese i le amataga o le tausaga, na moomia ai le fesootai atu i sui o loo alala i atunuu mamao. O loo faatino foi lenei lava auaunaga i totonu o polokalame faaleaoaoga a le Kolisi, faapea ma le Aoga Tusi Paia a Malua.

E manatu ua tele lava le sao taua o le Faiaoga taitai ma aoao o le vaega ole IT, mo le Kolisi i Malua faapea le Ekalesia. E talitonu foi, o taleni ma agavaa uma ua foai e le Atua ia i latou nei, ua faafaigofie ma sologa manuia ai polokalame a le Kolisi e moomia ai lenei auaunaga, faapea foi le Fonotele o lenei tausaga, ina ia manino le fesootaiga ma sui Usufono o Matagaluega o loo alala ma papa aao i atunuu mamao. O se auaunaga ua vavalalata ai tagata uma!

AAFIAGA O LE FONOTELE I FAIGAPALOTA A LE ATUNUU

E ui lava ina lutia le faigamalaga a le Ekalesia ona o aafiaga o le faama'i o le Koviti-19 ua aafia ai le lalolagi, ae ua le mafai lava ona taofia ai le toe usua o le Fonotele i ona taimi masani i le masina o Me i tausaga taitasi. Peita'i, e oo mai i le taimi tuupoina o le Fonotele i lenei tausaga, ua faauilavea mai foi se faafitauli le maalofia ona o le toe faatinoina o le Faigapalota tele a le atunuu ile vaiaso tonu e usua ai le Fonotele. Ona finagalo lea o Tama o le Ekalesia ia faataunuu pea le Fonotele i le vaiaso e tasi, mai le aso 9-17 o Me ina ia maua le avanoa e palota ai le Ekalesia i faiga filifiliga a le atunuu ile aso 23 Me 2021. Ae e masie foi, ona ua maea ona fai nei suiga, ae oloo talia pea se tonu mautu o Faigapalota a le atunuu! Ua toe faatumulia ai nei foi Maluapapa ile usugafono a Samoa nei e pei ona masani ai, e ui ina le auai mai nisi o matagaluega o le Ekalesia i NiuSila, Ausetalia, Amerika, Hawaii ma le motu i Sasa'e. O le afiafi o le aso Sa, 9 Me 2021 na tatala aloaia ai le Fonotele i se sauniga lotu a Tamā Toeaina o le Ekalesia. Ma na molimauina le lelei o fesootaiga mai Samoa nei i le faafofoga mai a atunuu i fafo ona ua lava tapena le vaega o le IT a le Kolisi mo le Fonotele e faaogaina ai ala o fesootaiga ile ZOOM. Ia viia pea le Atua i le auai mai pea o lona agaga ua mafai ai ona mafuta le ekalesia ma faataunuuina ile manuia lana Fonotele mo lenei tausaga.

CHARITY (GALUEGA ALOFA A LE KOLISI)

A'o gasolo ai feau ma galuega a le Kolisi i lenei tausaga, e lei tuua ai lava lana galuega alofa e faapapa'i atu ai i sui o le Kolisi ua faataotolia ai i mai tuga o le tino, ma ua le mafai ona faaauau le taumafai. O le Susuga ile aoao ia Falefiaolii Ulugia, faapea ma Periti Tauapa'i sa foaiina ai e le Kolisi se meaalofoa tupe. Sa faapena foi ona faapapai iai le Mafutaga Tina a le Kolisi e ala i le faalavalava. O le afafine foi ia Vanessa Alama o loo i Ausetalia, sa faimeaalofa foi iai le Kolisi. O lenei auaunaga alofa, oloo auau lava i talosaga molia a le Kolisi i aso uma, ina ia lagomalūina o latou taotoga tiga e le Atua.

VAAIGA ESEESE I LE KOLISI



I'U'LEO O LE MALUAPAPA



Komiti o le Maluapapa
 Makesi Neemia, Alesana Palaamo, Apela Ah Him, Leuelu Setu, Esera Esera.
 Hobert Sasa.
 Malua Theological College
 www.malua.edu.ws © 2021